

Assartuutit motorinik ingerlatillit atornerqarneri pillugit Namminersorlutik Oqartussat nalunaarutaat nr. 10, 10. oktober 2013

Avatangiisit innarlitsaaliorneqarnissaannik Inatsisartut inatsisaani nr. 9-mi, 22. november 2011-meersumi, Inatsisartut inatsisaatigut nr. 1-ikkut, 29. maj 2012-imeersukkut allanngortinneqartumi § 10, imm. 1, nr. 27, § 66, imm. 3, § 67 aamma § 68 naapertorlugit aalajangersarneqarpoq:

Atuuffissai il.il.

§ 1. Pinngortitap avatangiisillu illersorneqarnissaat eqqarsaatigalugu assartuutit motorillit sumi atornerqarsinnaaneri pillugit malittarisassat nalunaarummi uani aalajangersarneqarput.

Imm. 2. Illoqarfiit nunaqarfiillu nalunaarummi matumani tassaatinneqarput nunaminertat, kommuninut pilersaarummi illoqartittut nunaqarfittullu siunertaqarfiusunut atugassanngortinneqartut.

Imm. 3. Nunaannaat nalunaarummi matumani tassaatinneqarput nunaminertat, illoqarfiit nunaqarfiillu avataaniittut.

Imm. 4. Kangerluit imartallu sikuunermik nalaani nunaannarmiittutut naatsorsuunneqassapput.

Imm. 5. Nalunaarut manna Kalaallit Nunaata avannaarsuani Tunumilu nunamut eqqissisimatitamut, kiisalu sermersuarmut serminullu sermersuarmiit iigarfiusartunut atuutinngilaq.

§ 2. Assartuutit nalunaarummi uani tassaatinneqarput qamutit motorillit sulluunniit larvefodillit assakaasunilluunniit ingerlatillit, sikumi, apummi, qaqqani kiisalu nunap ilusaani allani allanngortinneqanngitsuni atugassatut sanaat taakkunaniluuniit atornerqartartut.

§ 3. Aqqusinerni, unittarfinni narsaatinilu il.il., pilersaarusiortarnermut inatsit malillugu atuisinnaatitaanissamik pisariaqartitsiviusuni angallanneq, kiisalu inuussutissarsiutigalugu nersutaateqarnermik ingerlatsinermut atatillugu angallanneq nalunaarummut matumunnga ilaatinneqanngillat.

Imm. 2. Nakkutilliinermut oqartussaasut avatangiisinik pinngortitamillu nakkutilliinerannut, annaassiniarnernut, politiit paasiniaanerinut, sakkutuut suliaqarnerinut assingusunullu atatillugu angallannerit nalunaarummut matumunnga ilaatinneqanngillat.

Imm. 3. Sumiiffinni, angallatit motorinik ingerlatillit atorlugit angallannermut inatsisit allat aqqutigalugit maleruagassiuiiffiusuni, maleruagassiat sukkulluunniit killilersuiffiunerusut atuutissapput.

§ 4. Illoqarfiup nunaqarfiullu killeqarfiata iluani assartuinnermut aqqutini angallannermullu killeqarfiit iluini assartuutunik motorinik ingerlatilinnik atuisarneq inatsisit allat eqqarsaatigalugit kommunalbestyrelsimit maleruagassiuunneqassaaq.

Imm. 2. Imm. 1 naapertorlugu assartuinnermut aqqutini angallannermullu killeqarfiit iluini assartuutunik motorinik ingerlatilinnik atuineq kommunip maleruagassiaani aalajangersarneqassaaq.

§ 5. Nunaannarmi assartuutunik motorinik ingerlatilinnik atuinisaaq inerteqqutaavoq, taamaattorli tak. §§ 3 aamma 6.

Imm. 2. Sumiiffinnik immikkut sunnertiasunik, assartuutunik motorinik ingerlatilinnik tamanik atuinissamut inerteqquteqarfiusunik maleruagassiuiffiusunilluunniit Naalakkersuisut toqqaasinnaapput.

Imm. 3. Angallannermut killeqarfiit iluini aamma/imaluunniit assartuinnermut aqqutini, § 6, imm. 1 aamma 2 naapertorlugu atugassanngortinneqarsimasuni Naalakkersuisut angalanissamut inerteqquteqarsinnaapput.

§ 6. Kommunalbestyrelsi Kalaallit Nunaanni Pinngortitaleriffiup siunnersuinera tunngavigalugu nunaannarmi ukiuunerani assartuinnermut aqqutissat aamma/imaluunniit ukiuunerani angallavissat toqqartorsinnaavai, § 7-imi aamma 8-mi piumasaqaatit ataanni assartuutit motorinik ingerlatillit sukumiisumik nassuiarneqartut angallatigineqarpata.

Imm. 2. Kommunalbestyrelsi Kalaallit Nunaanni Pinngortitaleriffiup siunnersuinera tunngavigalugu nunaannarmi aasaanerani assartuinnermut aqqutissat aamma/imaluunniit aasaanerani angallavissat toqqartorsinnaavai, § 7-imi piumasaqaatit naammassineqarsimannikkaluarpataluunniit angallatit motorinik ingerlatillit atorlugit angalanisaaq inerteqqutaanngippat.

Imm. 3. Kommunalbestyrelsi § 7-imi pinngortitamik illersuinissamut piumasaqaatinut minnerpaaffiliussat saniatigut aqqutini angallavinnilu, imm. 1 aamma 2 naapertorlugit atorneqarsinnaasuni aputip issussusissaanut piffissamullu piumasaqaatinik ersarinnerusunik aalajangersinnaapput

Imm. 4. Aqqutit angallaviillu, imm. 1 aamma 2 naapertorlugit atugassanngortinneqarsimasut atorneqarneri inuussutissarsiutinut ersarinnerusumik aalajangersarneqartunut inuussutissarsiutigalugu angallavissatut killilerneqarsinnaapput.

Imm. 5. Assartuutunik motorinik ingerlatilinnik assartuinnermut aqqutini angallannermullu killeqarfiit iluini § 6, imm. 1-3 naapertorlugu aalajangersarneqartuni atuinermut kommunip aalajangersagai kommunip malittarisassaani aalajangersarneqassapput.

Angallannermut ataatsimut aalajangersakkat

§ 7. § 6, imm. 1-imi ukiuunerani assartuinnermut aqqutissatut ukiuuneranilu angallavissatut toqqarneqartuni nunap qerinerani, apummik qallerneqarnerani aammalu naasunut nunamullu ajoqusiiiviusinaanngitsumik angallavissaalernerani angalanisaaq inerteqqutaanngilaq.

Imm. 2. § 6, imm. 2-mi aasaanerani assartuinnermut aqqutissatut aasaaneranilu angallavissatut toqqarneqartuni kommunip maleruagassatut aalajangersagai malillugit angalanisaaq inerteqqutaanngilaq.

Imm. 3. Imm. 1-imi aalajangersakkat immap sikuani aammalu tatsit kuuillu sikuini angalanermut atuutinngillat.

§ 8. Angalanermi nuna naasunut aseruutaasinnaasumik sangupiloorfigineqassanngilaq, aallarsarfigineqassanngilaq unipiloorfigineqassananiluunniit.

Imm. 2. Kuuit sinaat uingarnillu kiisalu tatsit killingi, kuuit annerit kiisalu kangerluit ikaarneqartassapput, naasut nunallu ajoquserneqarfissarinngisaasigut.

Immikkut ittumik akuersissuteqartarnerit

§ 9. Pisuni immikkut ittuni kommunimi assartuinnermut aqqutissatut angallannermullu killeqarfii iluini atugassiissutigineqartut avataani assartuutit motorinik ingerlatillit atorlugit angalanissamut kommunalbestyrelsi immikkut ittumik akuersissuteqarsinnaavoq.

Imm. 2. Immikkut ittumik akuersissuteqartoqarnissaanut qinnuteqaat tunngavilersugaq angalanissaq pilersaarutaasoq kingusinnerpaamik sapaatit akunnerinik sisamanik sioqqullugu kommunalbestyrelsimit tiguneqarsimassaaq, aammalu nunaminertat imaluunniit aqqutissat nalunaarsorneqarnerinik imaqaassalluni.

Imm. 3. Kommunilbestyrelsi immikkut ittumik akuersissuteqarnermut atatillugu naapertuuttutut isigineqarsinnaasunik piumasaqaateqarsinnaavoq.

Imm. 4. Immikkut ittumik akuersissutit Avatangiisinut Naalakkersuisoqarfimmu ilisimatitsissutitut nassiunneqassapput.

Imm. 5. Imm. 1 aamma imm. 2 naapertorlugu akuersissutit sukkulluunniit kommunalbestyrelsimit imaluunniit Naalakkersuisunit allannagortinneqarsinnaapput utertinneqarsinnaallutilluunniit, immikkut ittumik akuersissuteqarnissamut piumasaqaatit unioqqutinneqarpata, imaluunniit kommunalbestyrelsip Naalakkersuisulluunniit naliliinerat malillugu pissutsit pingortitamut avatangiisinullu ajoqusiisnaasut pineqarpata.

Imm. 6. Immikkut ittumik akuersissutit ukioq ataaseq tikillugu tunniunneqartarsinnaapput.

Imm. 7. Pisuni immikkut ittuni, soorlu piniariarnernut, timersornermik aaqqissuussinernut, pisortat assartuussinernut, ilisimatusarnikkut suliniutinut il.il. atatillugu, § 6, imm. 3 naapertorlugu aalajangersakkanik aalajangersarneqartunik saneqqutsinissamut kommunalbestyrelsi akuersissuteqarsinnaavoq.

Nakkutilliineq il.il.

§ 10. Kommunilbestyrelsip nalunaarummi uani malittarisassat malinneqarnerisut nakkutigissavaa.

Imm. 2. § 7, imm. 1-imi aamma 2-imi angalanermut maleruaqqusat piffissap ilaani naammassineqarsimanngippata kommunalbestyrelsi inerteqquteqarsinnaavoq peqqussuteqarsinnaallunilu.

Imm. 3. Peqqussutit tassaasnaapput angallaviit aalajangersimasut atorneqarnissaannik

piumasaqaatit.

Imm. 4. Inerteqqutit tassaasinnaapput sumiiffinni aalajangersimasuni piffissami aalajangersimasumi angallannerup tamarmi unitsinneqarnissaanik piumasaqaatit.

§ 11. Nalunaarut manna naapertorlugu aalajangikkat tamarmik avatangiisit innarlitsaaliorneqarnissaat pillugu Inatsisartut peqqussutaanni nr. 9-mi, 22. november 2011-meersumi kapitali 14-imi malittarisassat naapertorlugit naammagittaalliutigineqarsinnaapput.

Pineqaatissiinerit atuutilernissaanullu aalajangersakkat.

§ 12. § 5-imi, § 6 imm. 1-4-mik, § 7 imm. 1-imi aamma 2-mik aamma § 8-mik unioqqutitsineq akiliisitsinermik aamma/imaluunniit arsaarinninnermik kinguneqarsinnaapput.

Imm. 2. Piumasaqaatinik, § 9, imm. 3 naapertorlugu aalajangersarneqartunik unioqqutitsineq akiliisitsinermik kinguneqarsinnaavoq.

Imm. 3. § 10, imm. 2-4 naapertorlugit peqqussummik imaluunniit inerteqqummik unioqqutitsineq akiliisitsinermik kinguneqarsinnaavoq.

Imm. 4. Nalunaarummi akiliisussanngortitsineq tunngavilerneqarsimatillugu, Kalaallit Nunaanni Pinerluttulerinermut inatsimmi maleruagassat malillugit suliffeqarfik akiliisussanngortinneqarsinnaavoq.

Imm. 5. Imm. 1-4 naapertorlugu akiliisitsissutit Nunap Karsianut nakkartinneqartassapput.

§ 13. Nalunaarut manna 1. januar 2014-imi atuutilerpoq.

Imm. 2. Tamatuma peqatigisaanik Sisimiut, Kangerlussuup Maniitsullu eqqaanni assartuutit motorinik ingerlatillit atorneqarneri pillugit Namminersornerullutik Oqartussat nalunaarutaat nr. 5, 25. maj 1999-imeersoq, kiisalu Uummannami Upernavimmilu assartuutit motorinik ingerlatillit atorneqarneri pillugit Namminersornerullutik Oqartussat nalunaarutaat atorunnaarsinneqarput.

Namminersorlutik Oqartussat, ulloq 10. oktober 2013

Mette Lyngø

/

Søren Stach Nielsen